

## DEA SICILIA

Frunni d'alivi sott'a la luna,  
schina di munti supr'ê fussuna,  
occhiu di suli chi non sparagna  
chi trema l'aria supr'a campagna.

O dea Sicilia, gran matri antica,  
d'acqua e di boscu patruna e amica,  
bocca di focu, ciatu di lava  
supr'a tri jammi 'nto mari stava.

Ventu di notti 'nto gelsominu,  
di ciauru duci 'mpastatu e chinu.  
Sutt'a carrubba dava 'o pasturi  
carizza frisca comu d'amuri.

D' 'u mari niru comu 'u duluri  
purtava 'a casa lu piscaturi.  
Spartìa pi tutti a china manu  
aranci, viti, mennuli e granu.

Dintr'a la panza surfaru cova,  
ma custa caru pi cu lu trova.  
Si pari bona, poi metti in cruci,  
grida timpesta cu la sò vuci.

O dea Sicilia, d' 'u tuttu e nenti  
'a crisci e 'a sperdi la nostra genti,  
sangu a funtana d' 'u cori porti  
sangu di vita, sangu di morti.

O dea Sicilia, terra di mari,  
unni s'arriva pi non ristari,  
terra di sognu, lampu di luci,  
cantu d'amuri senza cchiù vuci.